

二經同卷

傷一

佛說未曾有經

甚希有經

佛說未曾有經

後漢失譯

如是我聞一時佛住王舍城耆闍崛山與大

比丘眾千二百五十人俱尔時尊者阿難晨朝著衣持鉢入王舍城正念乞食見有一處新作大舍重閣高顯戶牖彫飾牆壁嚴整無有風塵障隔寒暑尊者阿難見已即作是念若有善男子善女人作如是嚴麗之舍布施四方眾僧若如來般涅槃後若有善男子善

女人以如芥子舍利起塔大如菴摩勤果其刹如針上施槃蓋如酸棗菜若作佛像乃至如麩麦是二功德何者為多尔時尊者阿難乞食訖還本處飯食竟舉衣鉢洗足已往詣佛所一心恭敬頭面作禮於一面坐坐已白佛言世尊我於彼處晨朝著

衣持鉢入王舍城乞食見有一處新作大舍重閣高顯戶牖彫飾牆壁嚴整無有風塵障隔寒暑便作是念若有善男子善女人能作如是妙麗之舍布施四方眾僧若佛般涅槃後復有善男子善女人以如芥子舍利起塔大如菴摩勒菓其刹如針上施槃蓋如酸棗

菓若作佛像乃至如麩麦是二功德何者為多尔時世尊告阿難言善哉善哉阿難汝為多人故為安樂眾生故為哀愍世間故為大眾故為多饒益天人故乃以是義問於如來阿難諦聽善思念之閻浮提地廣七千由延北開南狹其中人面似如車形如是地上滿中

甘蔗竹葦稻麻叢林無空缺處猶如一體阿難是諸草木皆悉為人得須陀洹斯陀含阿那含阿羅漢辟支佛若有一人盡壽供養衣鉢飲食牀坐醫藥房舍所須具足供給至滅度後一一起塔各起塔已供養恭敬香花伎樂燒香塗香料香幢幡寶蓋如是具足於汝

意云何如此功德寧為多不阿難白佛言甚多世尊甚多善逝是善男子善女人得大功德佛告阿難置是閻浮提復有瞿耶尼廣八千由延人面如半月於彼中人亦復如是作大功德

復次阿難置是瞿耶尼復有弗于逮廣九千佛

由延人面圓滿於彼中人悉亦如是作大功德復次阿難置是弗于逮復有鬱單越廣萬由延人面正方於彼中人悉亦如是作大功德佛告阿難釋提桓因大莊嚴殿彫文刻鏤微妙奇特有八萬四千寶柱以天清瑠璃間廁黃金以為羅網彌覆其上金沙布地奇妙

旃檀以為欄楯復次阿難是天帝釋大莊嚴殿復有八萬四千寶窓亦以天清瑠璃間廁黃金以為羅網彌覆其上布以金沙旃檀欄楯復次阿難是天帝釋大莊嚴殿復有八萬四千天紺寶窓微妙嚴麗校飾如上復次阿難是天帝釋大莊嚴殿有八萬四千樓檣館

閻四出圍遶眾寶校飾亦復如上佛告阿難若有善男子善女人作是天帝釋大莊嚴殿施四方眾僧於汝意云何是善男子善女人以此因緣得大功德不阿難白佛言甚多世尊甚多善逝此善男子善女人得大功德佛告阿難置此四天下功德復置釋提桓因大

莊嚴殿功德若有善男子善女人作百千億釋提桓因大莊嚴殿施四方僧復有善男子善女人於佛般涅槃後以如芥子舍利起塔大如菴摩勒菓其刹如針上施槃蓋如酸棗菓若造佛形像乃至如麩麥此功德滿足百倍不及千倍萬倍百千萬億萬倍所不能及傷

不可稱量阿難當知是如來無量功德戒分定分智慧分解脫分知見解脫分復次阿難如來無量功德有大神足變化及檀波羅密尸波羅密羸提波羅密毗梨耶波羅密禪波羅密般若波羅密如是等無量功德佛爾時佛告尊者阿難汝諦受持此法阿難白

佛言受教世尊此名何法我等如來法中當云何受持佛告阿難此名未曾有法是一切清淨妙法方便我以是故殷勤囑汝此法當數數廣為諸天人阿脩羅龍夜叉乾闥婆迦留羅緊那羅摩睺羅伽人非人等分別說之當作如來善根功德種子一切衆生聞者得

入如來善根功德以是因緣故離諸煩惱悉皆成佛諸比丘聞已歡喜作禮

佛說未曾有經

雲間普照  
如國敬書

甚希有經

大唐三藏聖教序

御製

蓋聞二儀有像顯覆載以含生四時無形潛寒暑以化物是以窺天鑑地庸愚皆識其端明陰洞陽賢哲罕窮其數然而天地苞乎陰陽而易識者以其有像也陰陽處乎天地而難窮者以其無形也故知像顯可徵雖愚不

惑形潛莫覩在智猶迷況乎佛道崇虛乘幽控寂弘濟萬品典御十方舉威靈而無上抑神力而無下大之則弥於宇宙細之則攝於毫釐無滅無生歷千劫而不古若隱若顯運百福而長今妙道疑玄遵之莫知其際法流湛寂挹之莫測其源故知蠢蠢凡愚區區庸

鄙投其旨趣能無疑惑者哉然則大教之興基乎西土騰漢庭而皎夢照東域而流慈昔者分形分跡之時言未馳而成化當常現常之世民仰德而知遵及乎晦影歸真遷儀越世金容掩色不鏡三千之光麗象開圖空端四八之相於是微言廣被拯含類於三途遺

甚希有

序

訓遐宣道群生於十地然而真教難仰莫能一其旨歸曲學易遵邪正於焉紛糾所以空有之論或習俗而是非大小之乘乍泐時而隆替有玄奘法師者法門之領袖也幼懷貞敏早悟三空之心長契神情先苞四忍之行松風水月未足比其清華仙露明珠詎能方